



2022 -
2023

ТӨСӨЛ СОНГОН ШАЛГАРУУЛАХ
УДИРДАМЖ

✉ billiontreefund_team@toc.mn

🌐 billiontree.mn

ТӨСӨЛ СОНГОН ШАЛГАРУУЛАХ УДИРДАМЖ

Санхүүжүүлэгч:

Тэрбум Мод Сан

Төслийн санал хүлээн авах сүүлийн хугацаа:

2022 оны 12 дугаар сарын 15-ны 17:00 цаг

Нэг төсөлд олгох санхүүжилтийн дээд хэмжээ:

Төслийн чиглэлээс хамааран 5'000'000 - 100'000'000 төгрөг

Монгол Улсын Ерөнхийлөгчийн санаачилгаар “Тэрбум мод” үндэсний хөдөлгөөнийг уур амьсгалын өөрчлөлт, цөлжилт, газрын доройтлыг бууруулах зорилготойгоор 2021 оноос эхлэн орон даяар хэрэгжүүлж эхлээд байгаа билээ. Энэ хүрээнд Монголбанк, Монголын Банкны Холбооны гишүүн байгууллагуудын санаачилгаар Тэрбум мод үндэсний хөдөлгөөнийг дэмжих сан (“цаашид Тэрбум мод сан гэх”)-г 2022 оны 3-р сард үүсгэн байгуулж, Сангийн удирдлага, менежментийг Монголын тогтвортой санхүүгийн холбоо (ТоС Холбоо) хариуцан ажиллаж байна. Сангийн үндсэн чиглэл болох байгаль орчныг хамгаалах, нөхөн сэргээх, ойжуулах, мод тарих, уур амьсгалын өөрчлөлт, цөлжилттэй тэмцэх нийгмийн шинж чанартай бичил төсөл хөтөлбөрүүдэд буцалтгүй тусламж болон хамтарсан санхүүжилт олгох зорилгын хүрээнд Сангийн 2022-2023 оны “Төсөл сонгон шалгаруулах хөтөлбөр”-ийн удирдамжийг нээлттэй зарлаж байна.

1. САНГИЙН ТУХАЙ

Дэлхийн дулаарал хоёр хэмд хүрвэл манай гараг дээрх хорхой шавьжны 18%, ургамал, зүлэгний 16%, сээр нуруутан амьтдын найман хувь устаж үгүй болох, уур амьсгалын өөрчлөлтөөс үүдэлтэй байгалийн гамшгийн давтамж болон хүч нэмэгдэх эрсдэлтэй гэх тооцооллыг эрдэмтэд гаргасан байна. Энэ нь 2050 он гэхэд дэлхийн улсуудын Дотоодын Нийт Бүтээгдэхүүн (ДНБ)-ий 18 хувьтай тэнцэх хохирлыг учруулах эрсдэлтэй хэмээн урьдчилсан тооцоог гаргажээ.¹

Харин Монгол орны хувьд сүүлийн 80 жилийн хугацаанд жилийн дундаж температур 2.2 градусаар нэмэгдсэн байна. Энэ нь дэлхийн дунджаас 2.5 дахин эрчимтэйгээр нэмэгдэж буй үзүүлэлт бөгөөд Монгол Улс уур амьсгалын өөрчлөлтөд хамгийн эрсдэлтэй орон болох шалтгаан болж буй юм.² Мөн манай орны нийт нутаг дэвсгэрийн 76.8% нь цөлжилт, газрын

доройтолд өртөөд байгаа бол нийт бэлчээрийн 57% нь доройтолд ороод байгаа тоо баримт бий.³

Монгол Улсын Засгийн газар “Монгол Улсын Тогтвортой хөгжлийн үзэл баримтлал-2030”, “Алсын хараа-2050”, Монгол Улсын урт хугацааны хөгжлийн бодлогын хүрээнд 2021-2030 онд хэрэгжүүлэх үйл ажиллагааны төлөвлөгөөний 6.2.4. “Ойжуулах, ойн тэлэн ургалтыг дэмжих, нөхөн сэргээх, ой хамгааллын арга хэмжээ авах замаар ойн хомсдолоос сэргийлэн, ойгоор бүрхэгдсэн талбайн хэмжээг нийт газар нутгийн 9 хувьд хүргэж, нүүрсхүчлийн хийн шингээлтийг нэмэгдүүлнэ”, 6.2.8. “Хөрс хамгаалах, газрын доройтлыг бууруулах, цөлжилттэй тэмцэх үндэсний хөтөлбөр хэрэгжүүлнэ”; Шинэ сэргэлтийн бодлогыг хэрэгжүүлэх

эхний үе шатны үйл ажиллагааны хөтөлбөрийн 5.4.2-т “Уур амьсгалын өөрчлөлтийг сааруулах, цөлжилт, газрын доройтлыг бууруулах үндэсний зорилтыг хэрэгжүүлэх” тухай зорилтуудыг тусган хэрэгжилтийг хангуулахаар ажиллаж байна.

Ган, хуурайшил, хэт халалтын улмаас ой, хээрийн түймрийн давтагдал нэмэгдэж, ойн болон бэлчээрийн элдэв хортон үе үе хэт олширч, тархалтын хүрээ нь өргөжиж байгаагаас гадна хүний зохисгүй үйл ажиллагааны улмаас Монгол орны ойн бүрхэвч жилд 0.46%-иар багсаж, ойн нөөц хомсдох, доройтох үйл явц эрчимжиж байна.4 Ойн суурь түвшний тайланд тусгагдсанаар 2005-2015 онд жилд дунджаар 140,000 га ойн түймэр, хөнөөлт шавьж, мод бэлтгэлд өртөн доройтож, нийт ойн талбайн хомсдол 5,300 га-д хүрчээ.

Уур амьсгалын өөрчлөлттэй тэмцэхийн

тулд хүлэмжийн хийн ялгаруулалтыг багасгах үйл ажиллагааг дэмжих, санхүүжүүлэхээс гадна, газар бэлчээрийг нөхөн сэргээх, ойжуулах, мод тарих ажлыг хэрэгжүүлэх нь нүүрсхүчлийн хийг шингээх, уур амьсгалын өөрчлөлттэй тэмцэх хамгийн үр дүнтэй шийдлүүдийн нэг юм.

Иймд Тэрбум Мод Сангаас олон нийт, албан байгууллагуудын санаачилгаар хэрэгжүүлэх жижиг хэмжээний ойжуулалт, мод тарих, газрын доройтол, цөлжилттэй тэмцэх нийгмийн шинж чанартай төслүүдэд хамтын санхүүжилт олгох замаар Парисын хэлэлцээрийн амлалтыг биелүүлэхэд Монгол Улсын Үндэсний Тодорхойлсон Хувь Нэмэр (ҮТХН)-ийн зорилт, ногоон, тогтвортой эдийн засгийн хөгжилд бодитой хувь нэмэр оруулахыг зорьж байна.

2. ХӨТӨЛБӨРИЙН ЗОРИЛТ, ҮЙЛ АЖИЛЛАГААНЫ ЧИГЛЭЛ

Сангийн 2022 оны Төсөл сонгон шалгаруулах хөтөлбөрийн хүрээнд дараах чиглэлийн төслүүдэд санхүүжилт олгоно:

✓Чиглэл 1 – Төрийн өмчит цэцэрлэг болон ерөнхий боловсролын сургуулийн ногоон байгууламжийн төсөл:

Улаанбаатар хотод үйл ажиллагаа явуулж буй төрийн өмчит цэцэрлэг, ерөнхий боловсролын сургуулийн гадна орчны ногоон байгууламжийг нэмэгдүүлэх; сургалтын зорилгоор жимсний мод, хүнсний ногоо тариалах; хүүхэд залуучуудын сурч боловсрох орчинг эрүүл болгох; багш, сурган хүмүүжүүлэгч, оюутан сурагч, эцэг эхчүүдийн дунд мод тарих, арчилж хамгаалах аргачлал, ач холбогдлын талаар мэдлэг ойлголт нэмэгдүүлэх; цаашид үндэсний хэмжээнд түгээн дэлгэрүүлэх боломжтой загварыг бий болгох төсөл хөтөлбөр багтана.

✓Чиглэл 2 – Олон нийтийн оролцоонд суурилсан ойжуулалт, ойн нөхөн сэргээлт, мод тарих төсөл:

Ойн хомсдол доройтлыг бууруулах, ойгоор бүрхэгдсэн талбайн хэмжээг нэмэгдүүлэх зорилгоор түймэр, хөнөөлт шавьж, хууль бус мод бэлтгэлийн улмаас доройтсон ойг нөхөн сэргээх, ойжуулах, байгалийн сэргээн ургалтанд туслах, мод тарихтай холбоотой төсөл хөтөлбөр багтана.

✓Чиглэл 3 - Олон нийтэд тогтвортой хөгжил, экологийн боловсрол олгох төсөл:

Олон нийтэд байгаль, эх дэлхийгээ хайрлан хамгаалах сэдэл өгөх, экологийн боловсрол олгох, байгальд ээлтэй амьдралын хэв маягийг хэвшүүлэх, байгаль орчинд эергээр нөлөөлөх талаар олон нийтийн мэдлэгийг нэмэгдүүлж, хандлагыг өөрчлөх компанит ажил, контент, медиа, анимэйшн, боловсрол сургалтын хөтөлбөр гэх мэт экологийн боловсрол олгох төсөл хөтөлбөр багтана.

3. ТӨСӨЛД ТАВИГДАХ ЕРӨНХИЙ ШААРДЛАГА

Сангаас санхүүжилт олгох төслүүд нь дараах шаардлагыг хангасан байна:

- Төсөл нь дээрх гурван чиглэлийн аль нэгтэй нийцсэн байх;
- Төсөл хэрэгжүүлэгч нь энэхүү удирдамжийн 4-т заасан зорилтот бүлэгт хамаарч байх;
- Төсөл хэрэгжүүлэх газар, талбайтай холбоотой ямар нэгэн зөрчилгүй байх. Төсөл хэрэгжүүлэх газар, талбайтай холбоотой зохих зөвшөөрөл болон бусад холбогдох арга хэмжээг авч, баталгаажуулсан байх, дахин төлөвлөлтөд ороогүй байх;
- Төсөл хэрэгжих талбай нь ойжуулалт хийх, мод тарих нөхцөл, орчин бүрдсэн байх (ус, цэвдэг, цэвэр усны нөөц, тусгай хамгаалалттай газар зэрэг экологийн өндөр ач холбогдолтой бүсүүдэд төсөл хэрэгжүүлэх бол шаардлагатай бүх зөвшөөрлүүдийг авсан байх);
- Хэрэгжүүлэх төслийн төлөвлөгөөний зурган мэдээлэл, ландшафтын зураг төслийг хавсаргах (Чиглэл 3-т хамаарахгүй);
- Төсөл хэрэгжүүлэхэд шаардлагатай хүний нөөц болон бусад нөөцийг бүрдүүлсэн байх;
- Өмнө нь ижил төстэй төсөл хэрэгжүүлсэн гурваас дээш жилийн бодит туршлагатай байх (Чиглэл 1-т хамаарахгүй);
- Төсөл хэрэгжих хугацаанд хэмжиж болохуйц бодит үр дүн гаргах боломжтой байх;
- Төсөл хэрэгжүүлэх явцад Сангийн хяналт тайлагналт, мэдээллийн шаардлагуудыг мөрдөж ажиллах, бусад төсөл хэрэгжүүлэгчид, олон нийтэд төслийн талаар туршлага, мэдлэгийг хуваалцахад нээлттэй байх;
- Төсөл хэрэгжих гэрээт хугацаа дууссанаас хойш цаашдын арчилгаа, үйл ажиллагааг тасралтгүй үргэлжлүүлэх боломж, нөөцтэй байх;
- Өргөдлийн маягт, хавсралтыг бүрэн гүйцэт бүрдүүлж, гарын үсгээр баталгаажуулсан байх;
- Төслийг хэрэгжүүлэхэд хамтын санхүүжилт гаргах боломжтой бол давуу тал болно.
- Төслийн үр дүнд шинэ ажлын байр, эдийн засгийн үр өгөөж үүсэх бол давуу тал болно.

Сан зөвхөн дээрх шалгуурыг хангасан төслүүдийг үнэлгээний шатанд оруулах тул эдгээр шалгуурыг хангаж буй эсэхийг сайтар нягтална уу.

4. ТӨСЛИЙН ХАМРАХ ХҮРЭЭ

Чиглэл тус бүрт өргөдөл гаргах боломжтой байгууллагуудыг доорх хүснэгтэнд дэлгэрэнгүй харуулав.

Жич: Хувь хүн, ашгийн төлөө болон худалдаа арилжааны үйл ажиллагаа эрхэлдэг аж ахуйн нэгж байгууллагууд хөтөлбөрт хамрагдах боломжгүй боловч доорх байгууллагуудтай хамтарсан төслийн санал ирүүлэх боломжтой.

Өргөдөл гаргагч нь тухайн байгууллагаас нэгээс дээш хөтөлбөрийн санал ирүүлж болно. Төслийг хоёр ба түүнээс дээш байгууллага хамтран боловсруулж, өргөдөл гаргах боломжтой.

Хөтөлбөрийн үндсэн чиглэл	Өргөдөл гаргах боломжит байгууллагууд	
1	Төрийн өмчит цэцэрлэг болон ерөнхий боловсролын сургуулийн ногоон байгууламжийн төсөл	Улаанбаатар хотод үйл ажиллагаа явуулж буй төрийн өмчит цэцэрлэг, ерөнхий боловсролын сургууль
2	Олон нийтийн оролцоонд оролцоонд суурилсан ойжуулалт, ойн нөхөн сэргээлт, мод тарих төсөл	Иргэний нийгмийн байгууллага, олон нийтийн байгууллага, ойн нөхөрлөл, сумын болон сум дундын ойн анги
3	Олон нийтэд тогтвортой хөгжил, экологийн боловсрол олгох төсөл	Иргэний нийгмийн байгууллага, олон нийтийн байгууллага, төрийн болон хувийн өмчит боловсролын байгууллага, олон нийтийн мэдээллийн хэрэгслийн байгууллага, медиа контент бэлтгэдэг байгууллага.

5. ТӨСЛИЙН САНХҮҮЖИЛТ

Сангаас төслийн чиглэлээс хамааран санхүүжилтийг олгоно.

Хөтөлбөрийн үндсэн чиглэл	Санхүүжилтийн хэмжээ	Хамтын санхүүжилтийн шаардлага
Төрийн өмчит цэцэрлэг болон ерөнхий боловсролын сургуулийн ногоон байгууламжийн төсөл	30 сая төгрөг хүртэл	Хамтын санхүүжилттэй бол давуу тал болно Жич: санхүүжилтийг шууд олгохгүй бөгөөд мэргэжлийн байгууллагаар гүйцэтгэх ажлын хөлсийг Сангаас шилжүүлнэ.
Олон нийтийн оролцоонд оролцоонд суурилсан ойжуулалт, ойн нөхөн сэргээлт, мод тарих төсөл	100 сая төгрөг хүртэл	Хамтын санхүүжилт хамгийн багадаа 20% байна.
Олон нийтэд тогтвортой хөгжил, экологийн боловсрол олгох төсөл	20 сая төгрөг хүртэл	Хамтын санхүүжилттэй бол давуу тал болно

Сангийн санхүүжилтээр дараах төрлийн үйл ажиллагаа, зардлыг санхүүжүүлэхгүй:

- ТоС Холбооны санхүүжүүлэхийг хориглох үйл ажиллагааны жагсаалтад орсон үйл ажиллагаа (www.toc.mn);
- Төслийн үйл ажиллагаанд хамааралгүй захиргаа, үйл ажиллагааны зардал;
- Цахилгаан, дулаан, усны төлбөр, байрны түрээс, харилцаа холбооны зардал;
- Барилга, байгууламж барих зардал;
- Төслийн үндсэн үйл ажиллагаанд хамааралгүй тоног төхөөрөмж, эд хөрөнгө худалдан авалт;
- Олон улсын аяллын зардал;
- Нам улс төрийн зорилготой аливаа үйл ажиллагааны зардал;
- Шашны шинж чанартай үйл ажиллагааны зардал;
- Төслийн санхүүжилтийг шалгарсан гүйцэтгэгчтэй байгуулсан гэрээний дагуу гүйцэтгэлийн тайлан, санхүүгийн баримтад үндэслэн холбогдох хуваарийн дагуу олгоно.

6. ТӨСӨЛ ХЭРЭГЖҮҮЛЭХ ХУГАЦАА

- **Төсөл хэрэгжиж эхлэх хугацаа:** 2023 оны II улирал, Бүх нийтээр мод тарих үндэсний өдөр төслүүдийн нээлтийг хийнэ.
- **Төсөл үргэлжлэх боломжит хугацаа:** 36 сар хүртэл
- **Төслийн дараа:** Төсөл хэрэгжиж дууссанаас хойш хоёр жилийн хугацаанд арчилгаа, үйл ажиллагааны тогтвортой байдлын талаар явцын тайлан ирүүлнэ.

7. ТӨСӨЛ СОНГОН ШАЛГАРУУЛАХ ТУХАЙ

Өргөдөл бүрийг шалгаж, доорх шалгуур үзүүлэлтийн дагуу үнэлгээ хийнэ. Шалгуур үзүүлэлтүүд нь өөр хоорондоо уялдаатай бөгөөд тухайн өргөдлийн чанарт үнэлэлт, дүгнэлт хийхэд тэдгээрийг бүхэлд нь авч үзнэ. Төслийн чиглэлээс хамааран зарим шалгуур үзүүлэлт үнэлгээнд хамаарахгүй байж болно.

- **Төслийн үндэслэл, зорилго, үр дүн, хамрах хүрээ:** Төслийн үндэслэл, зорилго, төслөөс гарах үр дүн, нөлөөлөл, шалгуур үзүүлэлтүүдийг нарийвчлан боловсруулж, оновчтой тодорхойлсон байх;
- **Төслийн байршил, аргачлал:** Төсөл хэрэгжүүлэх байршил, авч хэрэгжүүлэх арга хэмжээг холбогдох судалгаа, үнэлгээний дагуу оновчтой тодорхойлсон байх;
- **Төслийн бүтэц зохион байгуулалт:** Төслийн удирдлагыг үр дүнтэйгээр зохион байгуулж, нөөцийн хуваарилалтыг оновчтой төлөвлөсөн байх.
- **Төсөл хэрэгжүүлэгчийн туршлага:** Өмнө нь ижил төстэй төсөл хэрэгжүүлж байсан туршлага, сайн түүх, байгууллагын чадавхтай байх;
- **Хамтын ажиллагаа:** Төслийн хүрээнд зорилтот бүлгүүдтэй хэрхэн уялдаж ажиллах, тэдгээрийн оролцоог хангах талаар тодорхой мэдээллийг тусгасан байх, зорилтот бүлгийг төслийн чиглэл тус бүрээр тодорхойлсон байх;
- **Төслийн тогтвортой, шинэлэг байдал:** Төслийг хэрэгжүүлэх үед олон улсын сайн туршлага, тогтвортой ойн менежмент, инновацид суурилсан болон бусад дэвшилтэт техник, технологийг ашиглаж, улмаар шинэлэг, цаашид сайн жишиг болгон өргөжүүлэх боломжтой шийдлийг санал болгосон байх.
- **Хяналт, тайлагналын төлөвлөгөө:** Төслийн хэрэгжилтийн явцыг хянахад шаардлагатай шалгуур үзүүлэлтүүдийг бодитой тодорхойлж, хяналт, тайлагналыг хэрхэн оновчтой хийх талаар тусгасан байх;
- **Төслийн арчилгаа, тогтвортой үргэлжлэх боломж:** Төсөл хэрэгжиж дууссаны дараа ч хөтөлбөрийн үйл ажиллагаа тогтвортой үргэлжлэн эерэг нөлөөлөл бий болж байх. Төслийн үр дүнд бий болсон ногоон байгууламж, ой мод, зэргийг цаашид тогтвортой арчлан хамгаалж авч явах боломжтой байх;
- **Төсвийн үндэслэл, тооцоо:** Төсөлд зарцуулагдах төсвийн тооцоолол бодит, зах зээлийн үнэд суурилсан байх ёстой ба үр ашигтай, хэмнэлттэй, үр дүнтэй байх зарчмыг баримтална. Өргөдлүүдийг үнэлэхдээ төсөв, нийт тарих модны тоо, нас, төрөл, талбайн хэмжээ, үр дүн зэргийг харгалзаж, харьцуулалт хийнэ. Зардлыг хуваалцах санал дэвшүүлсэн байгууллагууд давуу талтай болно;

8. ӨРГӨДЛИЙГ СОНГОН ШАЛГАРУУЛАХ ҮЕ ШАТ

Сангийн үйл ажиллагаа, бусад хүчин зүйлсээс хамааран доорх төлөвлөгөөт хугацаанд өөрчлөлт гарах боломжтой.

2022.10.08-нд	Хөтөлбөрийг зарлах	Төсөл сонгон шалгаруулах удирдамжийн зарыг Сангийн цахим хуудас болон хэвлэл мэдээллийн хэрэгслүүдээр түгээнэ.
2022.10 сард	Цахим мэдээлэл өгөх	Тэрбум мод сангийн талаар болон төслийн санал ирүүлэхтэй холбоотой мэдээ, мэдээлэл, зөвлөгөө өгөх 2 удаагийн цахим уулзалтыг зохион байгуулна.
2022.11.15 хүртэл	Төслийн урьдчилсан танилцуулга ирүүлэх, зөвлөгөө мэдээлэл өгөх	2022 оны 11 сарын 15-наас өмнө төслийн санаа, үндсэн чиглэл дээр Сангийн ажлын албанаас зөвлөмж авах хүсэлтэй байгууллагууд <u>төслийн талаар 2 хуудас товч танилцуулгыг урьдчилан ирүүлж зөвлөгөө авч болно</u> . Урьдчилж ирүүлсэн материалыг зөвхөн 1 удаа хянан, хөтөлбөрийн зорилгод нийцэж буй эсэх талаар зөвлөгөө мэдээлэл өгнө.
2022.12.15-нд	Төслийн санал, өргөдөл хүлээн авах эцсийн хугацаа	Төслийн саналыг ирүүлэхдээ цахим маягт болон холбогдох хавсралтуудын дагуу бүрэн гүйцэт мэдээлэл ирүүлнэ. Хугацаа хэтэрсэн болон дутуу бэлтгэсэн төслийн саналыг хүлээн авахгүй.
2022.12 сард	Ажлын албаны урьдчилсан үнэлгээ болон төслийн саналын техникийн үнэлгээ	Ажлын алба эхний шатанд төслийн материал шаардлагын дагуу, цаг хугацаандаа, бүрэн бүтэн ирсэн эсэхийг нягталж, шаардлага хангасан төслүүдийг Техникийн хорооны үнэлгээний шатанд шилжүүлнэ.
2023.01 сард	Газар дээрх шалгалт болон ярилцлага	Техникийн хорооноос хамгийн өндөр үнэлгээ авсан төслийн хэрэгжих байршил дээр Техникийн хорооны төлөөлөл болон ажлын албанаас биечлэн танилцаж, төсөл хэрэгжүүлэгчтэй ярилцлага хийнэ.
2023.02 сард	Санхүүжилт олгох төслүүдийг сонгох, батлах	Төслийн сүүлийн шатанд шалгарсан төслүүдийг Сангийн Удирдах зөвлөлийн хурлаар хэлэлцэн эцэслэж батална. Шаардлагатай тохиолдолд Удирдах зөвлөлөөс төсөлтэй холбоотой нэмэлт нөхцөл, шаардлагыг баталж болно.
2023.02 сард	Санхүүжилтийн гэрээ байгуулах, нөхцөл тохирох	Шалгарсан төслүүдэд мэдээлэл хүргүүлж, төсөл хэрэгжүүлэх, санхүүжилт олгох гэрээг байгуулна. Удирдах зөвлөлөөс төсөлтэй холбоотой нэмэлт нөхцөл, шаардлагыг баталсан тохиолдолд эдгээр нөхцөл дээр тохиролцож, гэрээнд тусгана.
2023.03 сард	Ландшафт төлөвлөлт, ойжуулалт хийх, мод тарих мэргэжлийн зөвлөгөө сургалтад хамруулах	Шалгарсан төслүүдийг нэгдсэн байдлаар мэргэжлийн ойжуулалт, цэцэрлэгжүүлэлтийн сургалтад хамруулна. Шаардлагатай тохиолдолд ландшафт төлөвлөлт, бусад мэргэжлийн зөвлөгөөг олгоно.
2023.04 сард	Шалгарсан төслүүдийг олон нийтэд зарлах	Шалгарсан төслүүдийн мэдээллийг олон нийтэд нээлттэй, ил тод зарлана.

Сонгон шалгаруулалтад тэнцээгүй төслүүдэд Сангийн зүгээс албан ёсны мэдэгдэл хүргүүлэх ба сонгон шалгаруулалтын үнэлгээ, нэгдсэн дүн болон бусад тайлбар мэдээлэл өгөх үүрэг хүлээхгүй. Тухайн жилд шалгараагүй өргөдөл гаргагч нь дараа жилийн хөтөлбөрт төслийн саналыг сайжруулан ирүүлэх боломжтой.

Төслийн сонгон шалгаруулалтыг явуулахдаа Сан нь дотоод засаглал, бодлого журмуудыг мөрдөж ажиллах бөгөөд төслийн сонгон шалгаруулалтад ямар нэгэн улс төрийн нөлөө болон ашиг сонирхлын зөрчилгүй байх зарчмыг баримтална. Сангийн бодлого, журам, хандивлагчид, Удирдах зөвлөл, хороодын бүрэлдэхүүнийг www.billiontree.mn вебсайтаас харах боломжтой.

9. ТӨСЛИЙН ХЭРЭГЖИЛТ, ХЯНАЛТ, ТАЙЛАН, МЭДЭЭЛЭЛ

Төслийн төлөвлөгөөний зурган мэдээлэл:

- Чиглэл 1-ийн хүрээнд хэрэгжих төслүүдийн ландшафт зураг, хэрэгжүүлэх төлөвлөгөөг мэргэжлийн байгууллагаар хянуулж, шаардлагатай бол сайжруулалт хийнэ. Чиглэл 2-т хамаарах төслүүд өргөдөл илгээхдээ ажлын төлөвлөгөөний зурган мэдээллийг заавал ирүүлсэн байна.

Хяналт:

- Сангаас төслийн хөндлөнгийн хяналт шалгалтыг зурган төлөвлөгөөний дагуу улиралд тутамд хийж, төслийн явц, модны ургалтыг хэмжинэ.
- Төслийн хүрээнд тарьсан модыг QR кодоор бүртгэлжүүлж, Сангийн нэгдсэн мэдээллийн санд бүртгэнэ. Мөн улирал тутамд төслийн бүхий л үе шатанд зураг, видео баримтжуулалтыг хийнэ.
- Шаардлагатай тохиолдолд Geospatial Tracking хэрэгслүүдийг ашиглан төслийн явцыг хянана.

Тайлан:

- Төсөл хэрэгжүүлэгч нь төсөл хэрэгжих хугацаанд жилд хоёр удаа үйл ажиллагааны хэрэгжилтийг тусгайлан бэлтгэсэн маягтын дагуу тайлагнана.
- Төсөл хэрэгжүүлэгч нь төслийн санхүүгийн тайлан, баримтыг мөн жилд хоёр удаа бэлтгэсэн маягтын дагуу илгээнэ.

Мэдээлэл, туршлага хуваалцах:

- Төсөлтэй холбоотой бүхий л гадагшаа чиглэсэн мэдээлэл, контент дээр Сангийн логог байршуулж, Сангийн маркетингийн гарын авлагын дагуу мэдээллийн ажлыг зохион байгуулна.
- Төсөл хэрэгжүүлэгч нь төслийн хэрэгжилтийн талаар мэдээ, мэдээллийг тайланд болон олон нийтэд таниулах зорилгоор хуваалцахад нээлттэй байна.
- Төсөл хэрэгжүүлэгч нь мэдээлэл солилцох цахим группт нэгдэн өөрсдийн туршлагыг хуваалцаж, Сангаас зохион байгуулах уулзалт, арга хэмжээнд идэвхтэй оролцоно.

10. ӨРГӨДӨЛ ХҮЛЭЭН АВАХ ТУХАЙ

- Өргөдөл гаргагч нь **2022 оны 11 дүгээр сарын 15-наас өмнө төслийн материал дээр зөвлөгөө авч болно**. Зөвлөгөө авах байгууллагууд төслийн талаар 2 хуудас товч танилцуулгыг billiontreefund_team@toc.mn хаягаар ирүүлнэ үү.

- Төслийн саналыг чиглэл бүрт тусгайлан боловсруулсан өргөдлийн маягтын дагуу **2022 оны 12 дугаар сарын 15-ны 17:00** цагаас өмнө ирүүлнэ үү. Хугацаа хожимдсон материалыг хүлээн авахгүй.

II. ХОЛБОО БАРИХ ХАЯГ, ЛАВЛАХ УТАС

Хэрэв танд төсөл сонгон шалгаруулах үйл явцтай холбоотой асуулт, тодруулга, зөвлөгөө авах шаардлага гарвал доорх хаягаар холбогдоно уу.

"Тэрбум Мод Сан"

Хаяг: Улаанбаатар хот, Сүхбаатар дүүрэг, 1-р хороо,
Парк Плейс 904 тоот

Утас: 8998 – 6002

Цахим шуудан: billiontreefund_team@toc.mn

Цахим хуудас: www.billiontree.mn



Ашигласан материал :

¹ <https://www.swissre.com/dam/jcr:e73ee7c3-7f83-4c17-a2b8-8ef23a8d3312/swiss-re-institute-expertise-publication-economics-of-climate-change.pdf>

² <https://www.adb.org/sites/default/files/publication/709901/climate-risk-country-profile-mongolia.pdf>

³ <https://met.gov.mn/public/storage/library-items/February2022/5xbnwn2UDxiCyjQYxKJf.pdf>